

兩浙輶軒續錄

兩浙輶軒續錄卷六目

徐崇熙 蔣尙英 祝朱白 唐起鳳 王榮統

鄭振銓 吳炳忠 張學伊 諸省三 魏銀河

孫誦曾 曹斯棟 鄒 諤 王炳虎 宋維藩

陳其璜 何經愉 陶維垣 朱 球 胡際泰

祝 勳 陳克繩 費士桂 朱 曉 陳 本

沈 乾 朱兆琦 張樹勳 朱光暄 費宏灝

馮國泰 盧 選 周元理 王榮綬 陳 新

楊志梁 丁 仝 姚 珽 吳 亨 祝懋敦

陳 錫 俞 虬 馮邦訓 方大綬 王登履

費蘭先 張綦毋 吳高竣 張守約 吳 棻

沈 喬 楊際昌 牟亦拱 申 甫 姚士湖

徐 瑋 嚴彭年 孫仁錫 曲 藹 吳寶芝

孫大獲 秦行涑 徐 昭 陳宗達 葉方莢

陳顧聯 馮光熊 崔學淇 張守愚 來學謙

毛鶴翀 夏 鴻 李 芝 戴樹元 沈起潛

沈 端 馮 錦 毛紹睿 徐鶴齡 李恭寬

陶士麟 陳開基 朱敏學 沈廷懷 汪繹辰

汪 浦 顧正謙 錢 森 曾 煥 周 澧

朱家濂 吳 坦 葉 藩 葉 棠 方 森

丁體仁 顧應期 傅 橙 蔣佐乾 張步瀛

兩浙輶軒續錄卷六

督學使者潘衍桐訂

徐崇熙

字敬侯西安人乾隆丙辰進士官直隸豐潤知縣著琴餘閒詠

西安懷舊錄敬侯幼偶儻鄙章句古文詩詞握管立就服官有廉聲

雞鳴渡放舟至樟樹潭

已近飛霜月偏爲鼓枻游驚瀾驅亂石孤島截中流渡晚難
聲寂潭空樹影秋安居輸野老入息向林邱

蔣尙英

字明卿金華人乾隆丙辰武進士官江西贛州都司

金華詩錄尙英少爲諸生好馳馬擊劍英氣颯爽不屑屑章句後就武科不廢筆墨詩亦楚楚

落花詩
有序

公車不第留滯京邸見落花有感援筆賦之聊寓寥

落之懷

可曾邂逅賞花人花落還成陌上塵有客重來非昨日憾余

歸去又迷津天涯淚盡朝雲曲南國香銷西子顰最是不堪
回首處畫眉聲裏獨吟身

惆悵佳人咽玉簫頓教池館亂紅飄數枝碧葉憑相憶一段
香魂不可招墜粉妝樓殘蝶夢斷霞煙渚度虹橋尋芳有恨
誰能識辜負詩仙幾酒瓢

祝朱白

字退庵海甯人乾隆
丙辰舉人箸藥房集

家傳略退庵工詩能文性伉爽與人交不設城府愛古
銅器尊彝之屬嘗罄館穀購之坐是益困游山石十餘
年歸時藥一囊
詩數卷而已

貞女詩

女爲堂叔廷庭第五妹幼字同邑孝廉查覽長
子臨昌待年二十二臨昌病亡女易縞素含貞

自矢既母兄潛議更字女偵知之號慟絕粒七
日而卒與族兄濟叔女倩姑前後稱發貞焉

灼灼蕙蘭質凜凜冰雪姿託根深且固含貞以自持贈言有
夙昔榮謝情不移單枝無獨秀苦被春風吹春風何太苦掩

淚逼秋期此心天地老此意鬼神知古人有窮餓女子亦可
爲七日腸欲斷九原誓相隨黯淡北邙墓交加鴛鴦枝道路
紛感激後先耀雙楣從容殉大義萬古幾鬚眉

唐起鳳

字羽豐號九峯平湖人乾
隆丙辰舉人著九峯詩鈔

石瀨山房詩話九峯美風儀嘗游虎阜某廉訪將抵任
泊舟山塘見九峯狀貌酷肖亡女遣僕相邀既謁見問
生辰卽女歿之日不覺大痛復詢習業以入成均對則
又大喜命執贄門下挈游數日臨別諄諄以努力爲屬
逾年舉於鄉

弄珠樓望月

樓高心目迴月淨水天腴成角聲悲壯遙山青有無照顏千
里別對影一身孤彼美渺何許波光似弄珠

贈錢虞惇

大經

嶄然頭角識錢郎珠玉風神錦繡腸門掩陶園書味樂夢回

陳榻筆花香

陳陶皆錢子讀書處

一終曲奏靈妃瑟萬選青來學士囊

咫尺天衢雲路近碧梧深處有鸞翔

王榮統

字貫卿號寅庵西安人乾隆丙辰舉人官鄠縣教諭

費淳傳畧寅庵性剛正人不敢干以私惟以甄拔真才申儆學校為先務訓導某不守官箴恥與同列即解組歸多士餞邑門外有泣下者

三藏寺

四圍青嶂合一徑白雲封門掩亂泉響花開敗砌穠院荒多
長竹僧老尙為農茶話能留客陰移古殿松

鄭振銓

字觀三歸安人乾隆丙辰順天舉人官縉雲教諭

處州府志振銓天才亮特博極羣書工詩古文辭乾隆丙辰以明通選縉雲教諭建崇聖祠修大成殿增置學舍與諸生肄業其閒主講蓮城書院遵其教者為文悉有法度

謝公巖

在縉雲縣南十里又名康樂巖

邈哉康樂翁平生抱微尚巖壑耽膏肓烟霞恣跌宕蠟屐南山南纜船上流上青雲古隄深白水飛流壯甘寒盍含暉琅玕森鐵嶂沿緣下石門疏鑿入意匠晴原朝雉鳴澄潭晚鱗漾仙棲梯可昇桃源小彌曠匿景寄沈冥忘機沒浩蕩游目四時迷賞心千載亮紫馬緬永嘉疇賡西堂唱

吳炳忠

字大文嵎人乾隆丙辰順天舉人官廣東知縣

縣志炳忠性孝友嘗館百里外問母病及晨而歸割股療之尋愈工詩與修邑志

送鄭布衣南還

戲具隨身木一竿吹簫擊筑有悲歡原非劇孟田儼侶漫作林逋魏野看見我何妨露肝膽逢人不必諱飢寒拂衣歸隱年猶盛且向清蹕賦伐檀

張學伊

字莘求號覺齋鎮海貢生乾隆元年舉孝廉方正

蛟川詩繫先生所居曰靜廉自題一詩有明月故窺同
習靜好風貪愛不傷廉句寄長君介石大令於京邸一
時名公卿如任宗伯蘭枝程京尹盛修鄧閣學鍾嶽趙
方伯城陳少宰邦彥鍾撫部音周宮詹長發陳觀察大
復陳相國元龍相國世倌齊侍郎召南張司寇照錢侍
郎維城萬編修經諸公皆有和作介石彙錄之爲靜廉
集齋

同萬九沙太史登城東山

不負登臨興憑高萬象同海噓嵐靄潤江放曉光融劇飲詞
源壯豪吟劍氣雄陳詩推太史只此足觀風

諸省三

字礪亭錢塘人著
榕齋詩鈔二卷

徐煒序畧礪亭詩深
情一往有西崑風味

登紫陽山

高秋天健晴黃葉散巖麓緩步登崇岡不藉一筇竹清風來
徐徐迤邐轉幽谷怪石踞獅象清池漾紋縠古寺松柏圍到

門就剝啄道人意何殷苦茗滌塵俗閒尋橋中仙坐看棊一局豈無得失機世外忘榮辱

與杭二堇浦憩沈漑堂書齋對弈

故人久不見握手一言歡爽氣橫眉宇交情託肺肝爭心忘勝負世味別醎酸把讀南遊集松濤洗耳寒

魏銀河

字星槎號秋浦錢塘貢生著桂巖小隱集

吳霽序畧秋浦于書無所不闕尤精文選學雅才淵思昌黎氏所謂餘事作詩人者吳錫麒序畧魏丈秋浦有桂巖小隱圖自標曠旨取適清襟流散芳華閒參禪悅

風篁嶺觀一片雲石用昌黎山石韻

幽篁成韻清風微嶺平路轉峯欲飛雨餘山翠滴未已野花有香開不肥何來此石雲一片玲瓏嵌空山中稀昔游夢想忽十稔愛而不見情渴飢今朝嫩晴勇登陟竹扛兜子穿巖

扉重逢石丈貌益古煙霞深處涼霏霏雲根小朵膚寸台潤
到草木清寒圍采茶聲裏林籟發時覺綠霧沾人衣不堪持
贈可怡悅請迴俗駕休相鞭無心出岫自終古澄潭噓氣神
龍歸

湖上秋陰

湖雲閒入畫人意澹于秋疎雨送歸燕遠煙明一鷗空濛如
向晚蕭瑟迴含愁多少殘黃柳涼陰樓外樓

孫誦曾

字頌清號懶雲仁和人官湖北
鄖陽通判著懶雲硯室稿

偶成

欲傍西湖買一邱未知此願可能酬安排詩句添游集收拾
山光入小樓永夜劇談留過客夕陽好處數歸舟自思清福
非容易知否蕭郎已白頭

曹斯棟

字僊耦仁利諸生箸飯穎山人詩五卷

緝雅堂詩話飯穎山人詩如過林隱君新居云滿地綠雲書帶草一闌紅雨米囊花臨安道中云地僻民樵冢刑清吏放衙僧院云灑地疎桐無月淡出山流水比人忙題王魯石獨立圖云人品潔於徐孺子詩才清似謝宣城皆不作常語山人工繪事題畫詩亦多佳者

過故侍郎嚴公臯園三首

轉巷餘遺構臨風憶侍郎梅魂蘇淡冶菜甲接青黃劣水艱

容艇閒雲低度牆數聲漁笛遠恍惚寄滄浪

舊有滄浪書屋

問訊名園竹按掌碧影寒當年文酒盛此地畫圖看風景隨

人事登臨感百端溪流扶杖聽彷彿伯牙彈

日落孤城暮風吹廢圃春亭虛松鼠竄石臥薜花皴徑已從

鄰割梁猶任鶴巡意行無不可惆悵百年身

葛嶺尋宋詩人高鞠礪墓

詩人遇多窮戈矛起筆舌誰歟負軼材而能免蹉跌有宋鞠
礪高風標露蟬潔馳譽翰墨場吟社每牽掣陳起集江湖振
淹非告訐豸冠何棗晉羅織面羞鐵若劉克莊若趙師秀周
文璞鬼彈靡遺子遐哉信天翁天肯无妄孽死葬葛嶺坳滄
桑幾度閱猿鶴與沙蟲輪迴一任擎不辭薨豎侵豈藉琬琰
揭無緣奠椒漿山頂雲英截

臨安青山鎮有豐碑大書錢王故里過此率賦

連山青青水搖綠市地濃陰瀉喬木垂鞭側首下層坡指說
錢王舊時屋錢王本是英雄人金戈鐵馬驅煙塵江表盪定
董昌死十四州擁稱功臣申丹書兮券如鐵盟帶礪兮剖璆
玦虎落蛇鄉九族誅何若開門節度之詞眞明決天水江山
已成古廟寢傾欹穴哮虎豐碑突兀龜昂藏大書深刻蟠螭

輔我來摩挲歎息三雲僵風冷行趁羶當日椎牛譙鄉里望
塵而拜趨丁男嗚呼望塵而拜趨丁男

閱鄺湛若赤雅因憶生平逸事乃綴四十字於卷末

案鄺初生時一慙上人見之曰此天上玉麒麟也愛
蓄古玩有琴名綠綺臺貧則出入子錢家製前後當
票序城破之日將玩好環列左右而死意若殉焉少
嘗師事阮大鍼泊阮羅織東林乃貽書絕之

邁種無凡骨城傾恥瓦全致身不撤佩服古愛張絃票序文
從創姦回燭最先懷才自淪棄掩卷劇悽然

鄒

諤

字介石海甯歲貢
著介石山人詩鈔

許捷傳畧山人邃老氏學和光同塵不爲嶄絕行嘗雜
行稠人中形貌寢古諸少年尾而訾之或以告不應再
三云始听然笑曰遽至是乎徐曳杖去顧性實高簡貧
甚獨未嘗廢詩歲大饑邑侯倡詩勸振和者千數日是

集也倘亦有負盛名而無詩者乎或以山人對侯曰丞
爲我徵之而詩竟不至嘗築生墳環以老梅百本時往
來吟哦其間顧門弟子曰死以片石題介石山人之墓
吾願畢矣善持議微而中與物交平易無忤色中年迭
遭家難亦或慘慘少樂所居曰小盤谷嗣復遷西巢者
數年當沒之前日猶策杖登吳山絕頂縱覽西湖南北
諸峯口伊
吾不絕聲

衡門

才疎身轉逸終歲託衡門屋老松生瓦谿迴竹抱村乞花娛
晚節溫句課童孫但得寤歌樂槃阿矢弗諼

憶絢亭三弟楚南

滿城風雨近重陽關塞遙憐客路長江水低飛孤雁影菊花
寒戀故園香折腰枉說求升斗聚首終慙足稻梁此際天涯
同悵望暮雲無際遠山蒼

漫成

榆景荒涼對夕暉
天時人事總相違
飯因儉歲香偏劇
書爲空函寄轉稀
自問銜蘆情已倦
早知戀棧計終非
閒鷗羨爾眠沙穩
煙暖春江伴釣磯

村舍

蠶帖深村掩戶斜
提筐一徑綠雲遮
鵲鳩向晚唳聲急
細雨牆頭溼棟花

王炳虎

字文也號秋坪嘉興諸生著秋坪詩鈔四卷

陳鳳鳴序畧文也學問瞻博日事吟詠以自適與同里許晦堂朱麗臯李敬堂諸人結文酒之歡往來唱和殆無虛日

晚步

秋暮風蕭蕭
落葉紛無數
古寺澹斜陽
行人自來去

移居

淒淒歲云暮戚戚多所虞我本東村人來適西村居舊宅已
云渺新宅復如何雖不寬與廣足以容我軀翠竹蔭後簷嘉
樹敷前除六峰遙當門對此心神舒種桑長水邊結籬春雨
餘日出羣動作攜鋤去榛蕪愛茲百鳥鳴頓令俗慮無佳客
遲不來怡然讀我書人生自適意何必尙奔趨

訪薛鹵齋

南村一水隔今始識君顏閉閣自高尙白雲相往還梅花開
屋角春草掩柴關此境殊蕭寂悠然天地閒

過興善寺懷朱南池

野寺餘蕭梁秋深少行客古柏翳斜暉橫空落遙碧憩石睇
流雲披榛訪遺蹟殘碑沒蒼苔嘯鳥喧林樾感物觸中情撫
景念疇昔美人役征途誰與偕晨夕

宋維藩

字瑞屏烏程貢生
著演游適歸等集

清溪洞

平糞縣西三里

策馬沿回溪徑轉得山麓森然敞雲關危亭出修竹洞穴關
何年靈奇拓山腹日月雙轉輪光遠不敢燭石髓寒漸凝狀
作雲濤蹙天吳及嬾蜨一一聽蹲伏時還揚其鬚噴薄出寒
玉清溪十壘長尾洩常不足

山下有大溪

斜容天一綫寬受車百

轂賴此佛力鎮靈區去恐速

洞中多佛像

掬泉煮新茗古碣摩挲

讀

碑刻甚多

不知塵勞身何緣換心目去去幾回頭林風滿巾服

渡洞庭湖

天雞喔喔曉前川榜人決起驚扣舷南風吹帆健于鵠朝霧
欲塞難沿緣風來霧散雲解駁輕蒲獵獵凌蒼煙東西南北
浩淼不可辨但見天宇四益垂無邊日華睽睽射不得一一

碎作青紅鮮空明一氣莽迴盪浪影直撼水底天不知洲渚
更何處惟有風檣萬點跼水如飛鷺而我輕舟獨容與布帆
安穩高聳吟詩肩君山巖嶂洲外小孤城樓櫓雲中懸舟子
相呼各致語日正亭午當空圓百八十里頃刻耳要是神力
人奚權君不見舟中之人髮半白讀書說劍今廿年青衫破
盡不得換曳裾歲走公卿前平生舉足與世迂失計復落滇
雲顛歸甘藜藿爲念母此意豈謂天公憐浮江涉漢路正遠
願守忠信輕濤淵酌神其許飽神德檣頭得食飛鴉還呼童
取酒酌罷詩亦就日影西下正透篷窗妍

述庵先生見示滇中詩集卽次見贈詩韻題于卷後

不破萬卷行萬里古不許以能詩稱杜李韓蘇亦如此筆端
時有煙霞騰先生讀書十行下五車百笥偕寢興餘事作詩

供游藝古光鬱出青嶂峻蓬池閬苑置身早鈞韶響過浮雲
凝別裁僞體振羣雅如掃霧障開榛芳南荒萬古吟不到炎
山色死寒於冰鞞刀帕首縱一往絕景天爲騷壇增是時緬
人肆螳臂上公玉帳輝環紱醜徒腥血滿油幕并與牛炙殷
肴胥先生磨盾草檄罷冰詞透洗黃茆蒸遂窮黑水極南海
自禹蹟後人無能蔽江流柿碎賊膽伏莽不敢高陵升旋輪
降款納燧象迺振勁旅迴雲鵬牛腰束詩歸示客筆鋒可斷
干矛矜尸林劒樹讀者倅虎頭燕領真堪憑賤子昔者走人
海偶攄吟詠淆淄澠先生贈言恢華縉南來急遽勞緘膝獎
許雖過意鄭重酬知十載心兢兢滇遊復悔交臂失厚睦終
不忘愚懵薄植何緣動青眼睛雲疊嶺披層層所嗟濩落魚
投罾研田墨稼成荒塍卽今更踏綠槐影倦無行卷輸羸膺

朝來把詩賴鼓勇和歌終憾力不勝側聞越賤策驥足冉驍
徼外還呼鷹行間詩在肯示我并付小史鈔溪藤

松巋山寺

松巋山翠裏初地壓坡陁一徑入林小綠雲侵座多水聲清
晚磬人語隔煙蘿暫息勞筋在塵緣媿我何

大通驛

平沙遠水漲初生楊柳煙梢綠向輕十里春陰江漠漠杏花
開後近清明

玉山

初日光寒乍透櫺晚風吹袂正泠泠白雲忽擁山腰路遮過
長松一半青

山城春色轉垂楊竹板肩輿石路長知是近南芳信早晴風

二月菜花香

初得衡酒

倒瓶衡酒釀於乳出網刀魚白似銀料得碧瀾堂下路有人
把盞話行塵

題畫

新綠全遮老樹腔蘋花開滿釣魚缸雨聲直到溪南屋聽盡
瀟瀟不掩窗

板橋驛

茸帽深衣客路遙朔風吹午醉全消四山殘雪疎林晚細馬
斜陽過板橋

陳其璜

字爾璧號鶴癯象山入乾隆

丙辰歲貢著丹山自鳴詩草
縣志其璜能畫梅雍正癸丑與修郡
志有答郡中索畫諸君詩贈炙人口

雪驄

王孫有馬名雪驄自誇來從渥洼中牽向前頭試一顧果然
不與凡馬同目夾方瞳電光紫尾撒圓裘朔風起稜稜寒玉
攢四蹏秋竹蒼涼插兩耳金勒雖絡橫難羈健兒熟視不敢
騎一息便能走千里惜哉此馬將老矣

何經愉

字樂天山陰諸全著停雲軒詩鈔

劉嗣綰曰先生少艱苦長而客游於外以名教自任終其身不遇以死宗稷辰曰先生久客中州主講周南書院二十年遂家焉

短歌行

長歌拂紅塵短歌攬白髮但恐暮景殘頓使中腸熱枯楊復
生稊枯草復生莧陽春澤萬物不上雙鬢絲我有一寸心遙
與千古期修途悵浩渺素志終乖違願借崦嵫日牢挂桑榆

樹留照讀書帷不墮虞淵去

釣竿歌

良人在何許言釣河之湄望涯不可渡浩渺令心悲持竿出門去枯楊未生稊飛絮倏如雪寂莫愆歸期郎作釣魚竿妾作釣魚絲不逐悲風斷長得相提携郎作釣魚絲妾作釣魚鉤不隨流水沒長得相沈浮沈浮兩不見歌終淚如霰

陶維垣

字愚墟號鶴門會稽諸生著鶴門詩文稿

陶審宣曰君早歲游粵遂家焉績學能文章嶺南士大夫爭相推重為學之旨務重根抵以致知格物為本嘗謂讀書必先識字識字自審音始能識字審音而後萬事萬物之理可窮生平尤邃于音韻之學時江段諸先生書尚未出君集切韻廣韻會諸書參以毛詩楚詞及周秦諸子中有韻可證者作韻辨一書光緒庚寅余重客嶺海訪君遺著君曾孫忭年七十矣哀韻辨手稿見示凡五大冊中有殘缺謀校補而刊之君尤工駢體文已刊行者曰鶴門雜俎

蒼梧七寺

層層疊嶂鬱離川環繞山亭竹數椽樹裏鐘聲催客夢雨中
花屐踏寒煙多情澗水潌如帶無數奇峯遠插天何事山僧
迎客至呼童敲石煮雲泉

登越王臺

突兀層巒控百蠻芒屨直上翠微閒銷沈霸業留殘笛寂寞
荒臺占舊山檻外帆懸青海夢雨餘草染碧雲鬟安陽神弩
誇先得往事疎林月一彎

山居雜興分賦得家字

依山傍水野人家曲磻幽通石徑斜雙屐苔經秋雨潤千峯
翠擁暮雲賒倦還倚樹看歸鳥興到臨流數落花空谷不煩
車馬迹未妨疎散負年華

越華書院

珠海文瀾此地看漫言佳氣盛衣冠會心已覺風行水脫手
應同月墮盤萬里煙霄秋夢冷十年風雨夜燈寒松枝自笑
稱都講苜蓿隨人日飽餐

清暉樓

翹首羅浮絕點埃層雲婀娜幾曾開倩誰移置江亭北歷歷
蓬山入座來
百尺湘簾捲夕陽窗開面面納湖光遠帆斜度沙鷗外無數
漁歌唱晚涼

題表弟胡某山高水長圖

曹山巖巖東郭東吾家別墅據橫峯澄潭千尺咽危石老幹
扶疎蟠怪龍自掛蒲帆來嶺海不見風光二十載披圖恍惚

舊游曾清流翠巘依然在中科頭人跌坐盤石劫游目干
重嶂靜聽松風颭斯人才華豔於雪草檄萬言手屈鐵沖霄
浩氣直如虹狂呼脫帽傾千鍾我對憬然亦動心高山流水
有知音何時返棹千巖萬壑裏松間一鼓囊中琴

書王母易氏貞節卷

恢恢六合閒百年等一瞥節孝能全人不識惟有天公不肯
相磨滅卓哉王母丈夫女閼闔崔嵬紹莞渚珊瑚洲畔采綠
回春濯繭館秋弄杼玉臺之鏡光離離山河之誓不可移雞
鳴肅盥漱上堂問起居夫壻不戚戚門內常怡怡卓哉王母
孝且慈海水羣飛湘竹裂朔風吹折雙飛翼呼天搶地誓不
生叫帝九閭巫陽泣呱呱膝下啼雙嬰堂上白髮垂星星地
下從君妾所願念此兩世肩一生百年有誰保忍死餐茶蓼

經營未定姑章別淚漬麻衣心亦槁兒能讀課兒書兒未成名母長吁兒既成名母則愉大節在三民弗渝天地有與相持扶

朱

球

字子道縉雲人乾隆歲貢著棠溪舛堂集

雜詠五首

錄二

鳳德豈有衰野雀固不識牢落在途中相顧徒唧唧物化相推遷茲理亦易測大海無津涯東流豈終極方舟濟廣川聊盡一日力無令梧桐枝千載混荆棘

朝見野雉羣飛鳴將遠適有兔何爰爰恐爾羅雉弋麥隴雖云曠未足爲樂國飲啄過十步虞羅已在側君看天際鴻弋人空太息

漁父詞

出浦雨新霽江花落春風裴笠者誰子獨釣寒江中江潭二月春水綠扁舟夜泊寒煙宿夜深棹月下灘去一片江雲起相逐

田家雜興

竭力三年耕止餘半年蓄不知亢旱頻連年絕斗祿妻兒自餬口浩蕩分半菽今年雨水多良田高下熟昨日天氣晴刈穫升新穀隔牆買濁醪饒噴過平陸人生如浮雲朝夕有反覆往時歎飢餓甯知今日樂且盡一日歡高歌出林壑

胡際泰

字寅若號相峯號子仁和人乾隆丁巳進士官雲南昭通通判

府志際泰家學相承踐履篤實歷知呈貢新平二縣擢昭通府通判雲南民苗雜處以惠愛撫綏人皆感德昭通饒金礦復產碧霞諸珍異一無所取比歸囊橐蕭然主講浦陽書院多所成就

杭堇浦自廣州還邀飲不至作此寄之

五嶺炎蒸二載遊歸來依舊領清流千雲氣概曾驚代倒海
詞源豈有儔酒戶不開成獨醒書城自擁作諸侯州名定益
因公著恰是當年柳柳州

祝

勳字元庵海甯人大興籍乾隆丁巳進士官廣西象州知州著志劬詩集

晚征

瘦馬疲行役揚鞭送落曛斷橋人獨立帶郭水斜分古寺一
聲磬遠山無盡雲勞勞君自取天末雁呼羣

陳克繩

字衡北歸安人乾隆丁巳進士官四川東道署希庵詩稿

縣志克繩東林山人著有西域遺聞詩經管見等書

西藏竹枝詞

千僧黃帽出王城最是呼圖克有名世界由來如露電何須

辛苦記前生

番僧高行者名呼圖克華言轉生不昧也在察木多者云已轉十三世

兩浙輶軒續錄

卷六

祝勳 陳克繩

齒

貝多羅樹葉長鮮采入沈檀百和研一氣氤氲流萬里瓣香

祇合拜班禪

藏香以班禪院中製者爲上取諸香屑雜以異樹之皮

繡衣花帶拜縱橫唐帽高高朱履輕別有紫金腰下袋拉弓

一盃傾連城

藏番朝賀盛飾腰懸木盃盛以錦袋盃以拉弓爲最貴

簪雲未挽舞婆婆斜著楮巴似絳羅最是層波愁渺渺美人

未醉亦顏酡

番女衣赤罽之服日楮巴皆賴其面

碧流千里海茫茫飛閣凌空夜有香齊向女呼圖克拜拔魔

宮外月如霜

藏西有羊卓白地海廣千里上建大寺名拔魔宮女呼圖克居之

故園回首數聲鐘小詔東開門幾重帝女不須還遠望洛陽

宮闕久爲烽

小詔乃唐公主所建以望鄉者門皆東向

積石城邊野草春三危嶺上露華新沈沈黑水南流海滾滾

黃河東抱秦

積石城在黃河沿三危卽今康詔地

小西天又大西天佛日慈雲一色連莫道西來行路遠乘槎

曾憶到張騫

藏西數十里有小西天再西有大西天即天竺國

費士桂

字富哉號丹林慈谿人乾隆丁巳進士由中書改官衢州教授

宿蓮花寺

雲山縹緲野人家中有香臺集暮鴉衲子自持三藏偈勞人
獨坐一池花階前草長侵獅座腋後風生試雀茶堪笑俗緣
猶未斷鯨鐘聽罷又塵沙

朱

曉

字脩亭號秋亭錢塘人著西村集

五鼓月下渡江覽金焦諸勝作歌紀之

統統五鼓天雞鳴江頭月下風泠泠榜人睡起治篙櫓半夜
打槳江中行須臾乘風達江口波長恍惚浮滄溟漁燈遠火
隱復見長空月白江天清數聲沙雁落遠渚疑有白鶴翔寒

汀長嵐近岫影逾淡崑崙弱水浮金庭扁舟一葉坐瀛海滄
濤萬頃凌層城火齊閃爍色燄燄蚪珠凸凹光盈盈誰攜長
笛倚空嘯激起波底魚龍驚金焦兩點失常度朦朧彷彿逾
娉婷是耶非耶愁漢武珊珊環佩空留形邢尹競秀各媚嫵
倏然而去花冥冥奇情異態絕渲染安得妙手圖金屏振襟
危坐攬奇勝風牕水枕搖心旌摺帆拗柁煙際去水晶宮外
揚秋舲長波一葦直翦取馮夷借得天風輕江光雲影倍澄
澈鮫綃織就龍梭停水妃恂怳出導我瑤池鐘鼓齊鏗錦鶴
林甘露宛可接浮圖卓立空亭亭初疑王氣未消歇秦王亦
赭丹徒爭回頭殘月墮京峴嗟我鐵甕生遙情

陳

本

字汝立仁和人
著集杜少陵詩

緝雅堂詩話汝立集杜句爲月詩雨詩各一百首繁篇
巧思如無縫之衣令人驚服有極幽秀者各擇一篇以

玉當片

詠月集杜

神光照夜年恣意向江天月出人更靜春歸客未還計疎疑
翰墨情在強詩篇斟酌姮娥寡何如穩醉眠

詠雨集杜

流霞飛片片寒雨下霏霏初月翳復吐浮雲薄未歸佇鳴南
嶽鳳不厭北山薇林僻來人少其如儔侶稀

沈

乾字沛思號東田仁和貢生

遊雲居山

高邱倚城隅四圍列荒園樓臺半頽敝惟餘楓樹古行行歷
層巔俯瞰迷環堵左眺湖水湄右窺大江浦乾坤任瀕洞風
煙遠吞吐惕息憩寺門徘徊日亭午稽首禮慈雲問訊周堂

廬中峯遺迹在拂拭離塵土摩挲子昂碑筆勢尤媚嫵勝事
今已遙名藍誰復主言尋慷慨人濁醪就市酤相對話沈淪
披襟瀝肺腑日暮陰雲生寒濤驚牖戶微月出林端朦朧隱
山鳴曳履趨前坡漏下又數鼓

朱兆琦

字青崖海宿巖貢著青崖詩草

海昌詩淑青崖先生仇爽尚氣韻
文名藉甚老而不遇齋志以沒

遊佛日山

石壁森巖崖輕嵐秀林麓上有飛流泉下有陰雲壑夾道來
松風幽響雜篁竹斷板縛溪橋清湍漱鳴玉春晴含野陰輕
煙浮林薄白雲時往還飛鳥相與樂中有忘機人翛然在樵
谷一經入幽深回首千山綠

沈山紀遊

谷口春殘俗事稀
雨餘山下豆花肥
高峯松翠千尋直
小院茶煙一縷微
卻喜穿林留石磴
偶來攜榼坐巖扉
晴暉天氣當亭午
移步禪房就解衣

題畫

村藏樹裏千家隱
帆轉江隈半幅遮
指點蒼茫烟水外
一峯殘照落寒鴉

一曲清溪斷板橋
短篷卻繫小塘坳
更添日暮林巒景
茅屋寒煙上竹梢

張樹勳

字星橋秀水廩生官陝西商州知州著星橋詩鈔

孫灝曰星橋工書法喜吟詠仕秦二十載歸裝甚薄可以想其節操矣

蘭州道中卽景

甘肅時運饑

振衣登隴坂遙指極西方
雪積終年白雲飛滿目黃鞭絲揮

月冷蹏鐵印冰僵回首三吳地關山萬里長

朱光暄

字蓉湖海鹽歲貢官於潛訓導著健初詩稿

沈潮傳畧於潛士俾喜訟先生正本清源俗爲之格士夫重之

寄慨

歲暮剖南瓜瓜卽卒歲資顏色亦自好中有子離離來年子
復子依舊繞東籬東籬有嫣花非不美及時一經秋霜來零
落辭故枝瓜瓞慶縣縣物類恆如斯

夏日村居

自愛幽閒地曾無車馬喧鳥嘯風際樹客到雨中村對榻殘
鐙影題詩舊墨痕依然三徑裏別有一乾坤

何事最相宜閒敲一局碁松風斜迳細茅屋夕陽遲小沼魚
添婢空梁燕哺兒此情誰會得莫被外人知

新夏日初長東風入座涼低欄傍燕子垂柳卧螳螂把酒差
無敵談詩不避狂客來驚犬吠此地正蠶忙

費宏灝

字愚軒烏程歲貢
著傳是編詩集

袁貞女

賦命雲同薄旌心柏共堅洗妝依母日截髮拜姑年春繭絲
難續冤禽海欲填皇華如過訪留取照彤編

馮國泰

字星階號鷺市會
潛諸生著鏡湖集

陶潛宣曰星階為乾隆間名宿出陳蝶園先生之門常
北游燕冀南走鎬洛作記室數十年所過名山大川幽
區勝迹悉記以詩名其集曰鷺市詩鈔惜
不傳鏡湖集其一也皆倦游歸里後之作

雜感

漫說凌雲賦子虛羞從狗監借吹噓奇憎干寶搜神記怪詫
東方罵鬼書詞客由來嫌碌碌達人原自夢蘧蘧劇憐病骨

支離甚羸得蒲團悟六如

黃塵市地任紛囂
猘獸居然吠及堯
老去擊壺悲伏櫪
狂來濡筆敢題橋
頭誠似虎何妨畫
心不如龍且漫雕
叩戶未應延俗客
還將塵壁掛詩瓢

唐宋兩放翁歌

竹並桑扶出非想
洪崖毛公均有兩
詎知鏡浦住詩人
亦自嘉名標競爽
鵝兒涇北湖桑東
越人但識陸放翁
船頭東書船尾酒
風流原與賀監同
蜀參禪放喧豪雋
共道署衙公所
僅誰識黃冠早得
心恰似相如漢
慕蘭千秋宮榜龜
堂詩兩賢共顯湖
山奇濡毫題壁搜
軼事勒銘須並南
塘祠乞湖倚閣名
皆盛何事呼翁後
偏勝徘徊一曲望
西村此中似有幸
不幸金龜貰酒呼
謫仙劍南集並春
波傳客以狂最畧
其次

顯晦各緣史所編
畫橋堤外垂楊綠
放眼緣翁窺蠶竹
魏家名將定無雙
那並淮陰說周叔

題邵竹村

功立

冰玉居

金谷繁華擬不如
署名外玉稱幽居
平田二頃陶潛秫
曲沼千頭范蠡魚
榻冷留雲長護劍
牕明待月靜繙書
觸蠻蝸角從渠鬥
笑指飛鴻悟太虛

春日雜感三首

漂泊渾如不繫船
依人歲歲劇堪憐
只餘宋玉臨江宅
絕少蘇秦負郭田
病馬長聞嘶苜蓿
蠹魚空自食神仙
鵲持螯觸都無用
擬熱爐香坐學禪

名勝鴻都幾廢興
燕臺梁苑感重登
秋風綠鎖王孫館
寒食金烏帝子陵
淞說牛蹄愁赤鯉
路隨驥尾笑蒼蠅
倦遊且向

南湖隱坐擁青氊几獨凭

歸田彭澤是吾師麋鹿生平幸指迷檄篆紫庭神禹洞碑摩
黃絹孝娥祠逢人莫漫彈長鋏投俗何緣得利錐載酒頻來
欣問字綠蘿春日正葳蕤

禹廟重刻岫巖碑歌

承帝曰咨諄佐卿久旅兼次岳麓庭聲牙詰屈七十二胥從
纒沐演至精蘭紙尙須殉玉匣況乃元要手所成鬼藏彪閔
閱遲久神物本應歸山陵有嫫在昔憂降洞萬國鬱塞昏靡
甯龍蛇恣毒鳥獸雜洲渚汨止洪流登司空受命委敷土智
殫形折勞經營九尾期愆白狐瑞三足蠱幹黃能腥荒窮攢
樹瘴續構怪託具存岳瀆經元圭旣錫應龍遣欣修禋祀酬
衍亨巡湘禮瀟襲軒履刻石總記華秦衡泥封曳塗聞自昨

至此外紀信有徵由來聖蹟維恍惚祝融守護嚴幽局萬七
丈穹宅蟒蝮四千歲遠迷榕栢密雲岫樓兩無定道士枉費
詞叮嚀昌黎南遷苦搜索猶望綠樹滂涕零千人壇矧睽楚
越蜩拳那得窺模形寸及黍戈賸剝蝕僅有窆石偕荒礪邈
疑曾否狩南岳多似帆履均虛名詎知顯晦數前定運至豁
開樵夫陁夔門大麓徧流布幾傳謨貢喧簧笙長沙太守心
聖緒肅欽何啻壁換城回頭忽憶舊游地劍埋佩沒空軒檻
移摹赤石鎮元闕在天壹慰鬟河靈越人從此誇異寶悚瞻
心畫攀嶢峭威芒奚第懾魍魎厭勝重許降翳冥離宮焉待
求鳥道宛如目覩齋馬刑我生雖晚居頗近啟戶卽見高松
青探穴已勝金匱史依井差倣白羽生莊誦不敢題讖語摩
挲祇怪神聳驚當時道滯瘁三過操耜躬橐凡幾星呈冠弗

顧履弗納呱呱未暇憐嘑嬰但急拯民出飢溺詎肯留意研
華菁奚乃哀事韻南濱全公勒典詳西傾旨微音古意深切
何以聖又兼多能抑其體勢尤詡詭似疇奎曲非芝英密猜
細想那得喻且從有物哆未曾乘黃銜脫奮蹏躍瑤草網拔
根檣撐乳凝寒溜仙柱折珠晃溟海癰龍爭沮裁頡頏聽作
祖懸揣未便逾錚錚韓誇薤倒頗形似崔云螺區真瞞盲洪
纖隨在示不測焉能不使雙眸瞳吁嗟墟拘下士陋坐井遽
欲小八絃開天邃古始三畫尙剖祕奧揚文明亶聰作后本
天授豈同凡俗資鉛縈摯惺受學姑無論一中固已傳帝廷
更兼功施盛呵護狂章章律從周行綠文旣拜濁河賜黑字
續踵臨洮呈五符協夢貺茅金六子匱祕開幽并魚精授圖
簡揆地雲篆萬態隨縱橫至人洞觸生變化引伸益助天機

迎洪荒奠定款朱鳥何難積矩推神行櫪垣得是證四載令
人轉視驚玉輶而且徙幽出爽塏跌依釳砌桓金釘州官封
鑰明裡肅拂拭典並虔省牲羽過顯昭明發犖爪腓永戴水
土平紙墨傳移更千萬再無昧泐愁嵐阮洵哉明德終不泯
食報不止牢粢盛贊皇吉日任丹鏤陳倉員獵憑金焚吾儕
耕塗享幹築至今稻飯安魚羹于春受福溯來處孰是酌水
忘源清從此歐圖泊鄭畧統作九鼎觀土釧昔賢徘徊未獲
見而我何幸貽雕瓊遂歌聊步元璧頌早覺雄氣吞崢嶸南
浮圭篆儻猶在仍思珠戶褰流鈴

登秦望山尋石刻

岫嶠夏禹記石鼓周宣詩鴻功垂不朽神物長護持咸陽焚
六籍古篆無子遺何因大易小更信丞相斯且復重文字諛

頌刊豐碑瑯琊嶧泰嶽延次及會稽自謂功德永三五並所
期詎知彈指閒已受山鬼欺岑石復何有記述惟史詞傳聞
士人語夙近何巖祠我來渺無覩屐斷葛枉披卽此尙斲滅
愈笑樓船癡何如夏與周珉璠光陸離

盧

選

字商衡東陽人著志陶集

盧檀曰志陶集已散佚不傳其友俞端士鈔一帙藏之
足見良朋之誼斷句如山花明夕磴雲樹淡煙嵐句成
喜未經人道境絕曾疑有夢遊僧歸
竹院烹茶綠人坐花陰對酒紅皆佳

書懷和徐梅庵

先生鯁直人禍福非所憚搖筆舒吟興燦爛天花墜羨彼淩
寒松淡茲芳春翠所欲豈異人富貴難力致功名圖不朽朝
華胡足企以茲白首時不懈青雲志誰爲後來者此懷當高
寄

別後書懷寄趙藜閣

日暮歸來對翠屏
疏櫺光透曉霜青
知君也坐寒山月
耿耿長宵正獨醒

周元理

字秉中號燮堂仁和人乾隆戊午舉人官至直隸總督工部尚書加太子少傅銜

杭郡詩三輯燮堂由清河道秉臬開藩奉勘滅河濬治得法開府山東疏請沂山清河濰及大宛良鄉等二十餘州

制直隸修天津之海河疊道及大宛良鄉等二十餘州縣通京衢途並茨尾雅河盧僧河諸隄岸民多利賴又

勘入旗在官荒地四百餘頃召佃墾種乾隆四十年壽

賜旬封綬壽匾額

兩賜詩章
詔改熱河爲承德府條陳事宜均

允行

甲午冬日按部至內邱再憩圓津庵感懷藹然禪師

四陽古通津輪蹄紛來往寶剎創何年幽如隔塵壤廣平昔

寄迹此地頻解鞅導門小閣黎入座延清賞微聞迦陵聲滿

庭花木長肅衣禮瞿曇篆煙籠繡幌老僧有道者貌古神超
朗夙抱慈悲心給孤闢園敞收恤無告民佛門直濟養始信
推仁術儒釋固無兩前賢題詠多清詞埽塵埃覽罷意翛然
如如涵萬象楞嚴信手繙皈依忽結想亦思竹院游回盼徒
惘惘偶於過慈航小憩挹蕭爽彈指已十年重來叩方丈老
僧驂鸞去衣鉢今誰掌猶憐子弟賢一燈續明晃百年駒騁
隙萬事蛛營網卽境已成空鴻泥復恂怳作歌對皓月隱隱
鐘魚響

王榮綬

字紫卿號若庵西安人乾隆戊午舉人著若庵文集

縣志榮綬幼穎異博涉經史下筆如泉登薦後以父老不就選侍奉之暇益肆力于古文士林多就正焉

過耿山寺

耿山亭畔淨塵氛到寺鐘聲午不聞小徑花留經宿雨閒門

松帶上方雲香烹活火春前茗鮮煮新苗澗底芹我欲從師
分半榻好將蘿薜隔喧紛

倚雲山房

山深雲氣多撥雲尋徑入但覺襟袖涼不知濃翠溼

陳

新

字秋江海鹽人乾隆戊午副貢官
湖南辰州通判著祺遊計程小草

李兆洛傳略公以州判分發湖南時苗疆事棘權永興
縣事調發旁午如期立辦兩宰綏甯悉心撫輯民皆得
所會歲歉設法平糶全活甚眾
其去也士民謳頌爲立去思碑

聽曲

雲山行不盡聽曲且停鞭細雨黃昏裏青燈旅館前蠻音歸
別調急節促繁絃異地難爲樂羈愁更惘然

楊志梁

字蓀皋海鹽人乾隆戊午
副貢官山東日照知縣

續梅里詩輯明府罷官後築室於梅
墅竹垞之偏旋花盤石以詩娛老

李丈余吾見贈甘泉漢瓦研賦謝

古瓦十二傳觀奇團樂一一符月儀其背隸法誰所爲得非
史邈丞相斯吾聞甘泉祖龍遺漢武因而挾拓之千秋彝鼎
滄桑移典物往往飛煙隨李侯嗜古追軒羲搜羅金石恣邀
嬉秦中壯遊荆棘披殘碑斷碣窮鎗釐此瓦無乃神護持堅
緻細膩無纖虧我昨見之神爲馳手搨作圖急裝池爲我割
愛瓊瑤貽長生無疆起積衰感君真意浹骨肌挹以勺水研
隄麋媿無好句足解頤願同壽考永寶茲

丁

佺字致堯號松老
敬子錢塘人

題杭堇浦二丈赴召集

韓杜不可作斯文漸汨沒誰能挽狂瀾夫子奮巖穴力追風
雅遺彬彬紹前哲孤吟動清商逸韻儼白雪不獨茂春花于

茲掇秋實大可醫膏肓小亦愈頭疾經國須賢手造醴必麴
檠束帛賁邱園旌蒲耀衢術儒林歎異數耆長並橋舌乃知
北溟鱗會化摩天翮披吟發長嘯清風動林樾

姚

珽

字搢方錢塘人
著白湖小稿

注新序畧白湖詩直抒胸臆取給興會無鑣肝毓腎之
苦桂堂諸老得白湖以張其軍白湖詩名遂聞江南矣
顧光曰堇浦杭先生以經術倡東南餘事為詩所至壇
坫弟子在里中者丁健邱永陳鴻寶徐堂萬福鄭之翀
而白湖最著成詩若干卷情思蕭放而詞語
麗則不以比擬掇拾為工可謂得其神似

高義園謁范文正公祠二首

義莊傳勝地

聖代錫嘉名詎獨瞻同族還看風百城雲初歌世德喬木抱
春榮作記劉公輔崢嶸翠碣明

錦袍瞻玉座璇榜耀丹楓憂樂分先後功名殫始終松楸萬

壑拱俎豆四時同采采蘋蘩薦高風仰未窮

南鎮

會稽古南鎮傑構冠羣麓山寒澗流斷樹老葉盡禿爲湖封
秩崇穹碑耀巖谷春秋奠牲幣永錫越州福日暮走村民襍
被競止宿偃僂拜廟下夢兆冀神告或以年壽祈或以名利
祝習俗喚不醒覩縷再三瀆人生一大夢百年同轉燭吉少
噩則多無勞太人卜松風萬壑鳴謾謾心神肅大覺自有期
莫問黃梁熟

江閣晚望

層樓閒徙倚近晚更脩然遠岸有歸鳥空江起暮煙微茫漁
浦樹迢遞定山船沙磧明如雪江流又變遷

吳 亭

字次公仁利巖
貢箸南越新吟

吳振械傳畧次公與楊制府應琬有同門之誼楊開府
粵東次公爲粵游主講陽山書院余所見南越新吟手
稿皆粵游
時詩也

題杭太史

世駿 嶺南集

不許先生簪白筆
箸書充棟亦徒然
天留謝傅東山住
人仰昌黎北斗懸
老去情懷偏跌宕
遠來詩格倍清妍
莫教流轉溪蠻手
織上弓衣祇浪傳

祝懋敦

字果山海甯貢生
著廉讓居吟藁

耐冷續譚果山能詩工書旅
食京華旋游山右館於張氏

詠閒

飽食日無事閒行隨我意
園林微雨過香滿落花地
日永鳥慵嘯波皺魚暗戲
沿緣厯亭館樹密陰交翠
掃榻延清風曲肱恣酣睡
夢中人有言覺來我能記
莫向不閒人說此閒中

味

陳

錫

字友梅桐鄉嶺貢官青田訓導

陸敬安日友梅學博績學能詩晚歲官青田訓導蕭然一穗吟哦自得

芝田

百里芝田隸括蒼一城斗大似村鄉龍鬚草細密成席龍鬚草如龍鬚土人取之織席因名鵝卵石圓高築牆民閒少磚牆多以石卵砌之曉雨采樵

閨女慣邑之八外都有鍾氏聚族而居不婚外姓生女不纏足自幼耕田砍柴嫁後入市交易其夫守戶而已謂

之畚民之畚夜燈課讀塾師忙何當羣鶴重飛集科目聊增藝苑光

明永樂庚子鶴大集一邑中式十六人自後鶴至必得科名然亦寥寥矣國朝一百六十餘年以來登科者僅四人

張貞女

并序

貞女父希賢許字沈氏子沈卒縞素歸沈克修婦道

閱八載病亡

未識夫君面終身願託依其牢惟木主入室便麻衣八載冰霜潔千秋節義稀他年豕樹上匹鳥定雙飛

俞

蚪字客雲號守愚鄭人欽旌孝子

李開元傳畧蚪天性篤摯嘗吮父疽刲股和藥父覺嗟歎不終飲既死蚪號痛聲徹里巷母老侍寢不入私室居數年母病劇有王大山精岐黃與蚪厚而道遠數十里蚪急欲致之大山遽來曰吾夢君告急五更起來此蓋蚪精誠所致也進藥卽瘳昆季同居終身人無閒言

鵲鵲篇

流水東西源於一瀆南北槎枒敷於一木厥脈之通不殊骨肉殼哺旣成各分爾形念彼在卵實同所生物不盡蠢人匪獨靈謂予不信視彼鵲鵲

馮邦訓

字曦屏臨海人

謁仙巖大忠祠

忠魂栖海嶠秘洞闢仙巖霧重蒸林溼潮腥齧石鹹摩天想
雕鶚拔地有松杉仗節從丞相張胡信不凡

方大綬

字仲纓
金華人

閨怨

溶溶空庭月照我獨眠牀反側不能寐緩步出蘭房池蓮開
並蒂邊雁飛成行郎非薄倖兒何不思故鄉形影自相弔一
顧一斷腸信誓空復爾賤妾奚所望

王登履

字步青
西安人

大乘寺題壁

峭壁谿衍一寺懸盤盤飛閣出層巔人經石罅題名姓僧臥
雲窩閱歲年遇虎自知生有命驂鸞應悔昔無緣纖林初月
當衣落雙鬢飄蕭幾惘然

費蘭先

字心如歸安人乾隆己未進士官直隸安肅知縣

杭堇浦先生留飲卽事

言返臨溪宅重來立雪門放歌期白首託志抗清尊下潁田何有聯珠集尙存今朝寒意重風過一燈昏

張綦毋

原名元器字大可號潛齋南英子平陽歲貢著潛齋詩鈔

吳承志曰綦毋少承家學與兄元品俱好題詠元品傲明七子墮入浮響綦毋獨以氣魄勝落落白豪同時甌中作者莫能與之比肩

快軒詩則潛齋從武林桑磬甫游得其指授遂專心爲之力求臻古人堂奧今觀所爲古詩體格與磬甫實相

似生平好古博覽於四部之籍俱曾究心說經門徑頗涉漢學

古詩三首

出亦不逢人入亦不逢人冥茫七里霧客子迷前津雞鳴聞樹巔犬吠叩柴門自任莊生化誰言揚子貧

出亦長苦飢入亦長苦飢春至少晴日風雨恆淒淒長鑱行
采蕨衝寒挽短衣高樹巢久落老鳥何處飛
出亦復苦愁入亦復苦愁茅屋栖巖下耕畚忽白頭日夕烟
火遲薪溼眼淚流獨足夜跳跟山中難久留

甲寅冬暮書懷

少日撫書史所得一鴻毛老去事稼田俯仰終歲勞人生衣
食計命分將安逃耕也餒在中適遭旱與澇怨咨復奚庸地
迴天高高

嗟彼松下原何時犁爲田原下有陳人長夜卽千年金丹諒
無益誰見羽化仙古人守樵牧勿藥得元詮

去日日以去去日不復遇來日日以來來日慮當豫齒髮催
吾老流光惜虛度少年恆志廣結交都陌路腰鎌來刈藿俚

偃行日暮今日成老翁紅顏昔坐誤

吾廬日以倣吾徑日以荒歲暮天欲雪萬里雲茫茫逝將適
樂郊倦翮愁飛翔君子有固窮小人氣揚揚

閉門自種菜旱久抱甕灌機巧非所習守拙力亦半采摘供
烹芼聊用下晨飯尼父鄙樊遲居貧吾所慣

仰視天蒼茫白日照水邊東風漸蘇枯園梅得氣先吾道何
由光對茲一惘然太息人世事浮生多所牽

秦人燔詩書六籍義不明漢石刊鴻都儒流稟先程如何後
起者臆說多紛更吾欲竟此誼窮愁書未成田父泥吾飲窗
下嘗一瓶積然爲之醉不知西日傾

重題史先生祠同前韻二首

鄒嶧山中草樹新一時懷古惜沈淪游當暇日偕王李老抱

遺經汭洛閩柱石偶題南蕩句布衣不涅北都塵向來誰續
龍門傳太息初唐少舊人

梓里新祠闢水涯春風入座儼青華千秋業就名山隱一瓣
香留處士家化去行年同伯玉書傳弟子得侯芭石虹有塢
松雲近剔讀苔碑日欲斜

四十九盤歌

入眼四十九盤嶺一盤一盤上峯頂吾聞峻絕九折坂到此
鳥道羊腸險莫並急卸籃輿下自絆芒鞋緊再厲再進一噴
一醒背負萬里無極之青天足捫千尺不測之深淵不畏跌
作山下泥飛身直上淩蒼煙東海一勺水千峯一朵蓮拍手
大笑子晉謝世今日忽登僊回視我友二三山腳磨蟻旋招
爾雲中黃鵠來翩翩招爾雲中黃鵠來翩翩

雞冠花和作

天雞號月墮曉霜青娥怯舞釵靚妝玉顏含顰射曦芒惆悵
不得終霓裳風送王母遞雲將侍從百鳥朝鳳皇雲中君兮
紛紛忙帝遣謫降雲中央雲中片羽墮吉光絳帳我我冠秋
芳摧殘餘影頗低昂露立中庭夜何長芙蓉遲放桂含芳金
風瑟瑟吹晚涼仰望織女邀雲章錦段忽遺滿青箱一曲玉
樹神揚揚瓊枝璧玉耿七襄遶墀促唧鳴蛩蛩翰音寂寂隔
天閭欲歸河漢渡無梁感歎斗下丈人行零落中野久相忘
日暮顧影棲短牆孤雄意氣迴橫翔眼明餘子收絳囊采釀
雲液箸僊方明年鶚鸞句芒藏詩人脣吻鼓笙簧窗下題和
愧琳瑯開窗一笑飲花旁

秋日雜感

夜長不能寐起坐天未明衆星何歷歷月落參半橫涼風颯然至撼撼墮葉聲喟然發長嘆竚立以屏營感此時序變慨與憂內并念我蒲柳姿豈任霜露更滄海無回波晝日易西傾人生苦役役白首俄已成空懷千載上但靳後世名

蒹葭滿門前白露已爲霜溯洄從伊人山遠水復長水長不可涉山遠徒相望今日復何日念子進一觴今夕復何夕我歌悲且傷悲傷豈可極棄置永相忘呼童抱我琴爲鼓一再行默坐見古人幽思入微茫嗚呼知者稀鍾期固已亡

客從遠方來攜坐開素琴一彈水仙曲泠泠有遺音成連去已久誰能辨幽深茫茫大海際刺舟何處尋

我嘗登天山蒲伏勞腎尻我嘗觀曲江倏忽漲波濤歸來坐前楹飲酒樂陶陶有水不在深有山不在高置身一邱壑意

氣亦自豪路逢誇奪子視我如鴻毛煎焚何太急無爲學蘭膏

平原極目望木落霜天高四山獵火紅百獸爭竄逃短後馳駿馬射虎南山坳雕弓掣電開矢發如風猋狐兔盡何益無爲多殺燒取彼中山狼歸來充我庖

園菊光蕤蕤霜下耀寒英百卉久零落見汝眼蹙明蓬蒿昔未翦百草爭敷榮涼風一以至衆穢變枯莖南山日夕時爲汝繞徑行攜尊一相傍悵然愧平生

孤桐雖入爨難忘憔悴時繭絲雖入纒不解纏絲思憂來復何端令我不可支無營常汲汲無蹙常咨咨側身天壤間乃獨惜無知禽息而鳥視身滅名亦隨紛紛道暍死稅駕安所歸願爲膝上琴慷慨寫吾悲

吳高垓

字韶鈞號齋亭嘉興人乾隆辛酉舉人官江蘇桃源知縣

沈業富傳畧公弱冠從桑坡甫遊講求性理之學登賢書後歷任鹽城荆溪甘泉等邑署蘇州同知所至多惠政最後宰桃源以抗直不屈忤上官遂引疾歸嘗點勘五經史漢數十萬言藏家塾好吟咏楷法近鍾王流傳甚廣

省家孟敬齋

高增

於山陰隨桑先生禊飲蘭亭同人賦

詩以清流激湍映帶左右爲韻分得右字

上辰鶯鳥鳴水注桃花候蘭渚可春游敬從耆英後俯玩水
苔榮仰瞻喬木秀高嶺列亭前清湍縈檻右遠岫淡修眉淺
綠畫新就高唱永日酬長箋末座授音叶韶獲鳴韻遏管絃
奏薄莫川上歸月上餘霞收

張守約

字力民號研農烏程人乾隆辛酉舉人官江西石城知縣著綠梧書屋詩鈔

吳興詩話閔晴巖潞河舟中同力民昆季作有簾閒暮雨吟紅蠟篷底秋風話碧紈之句

初春對雪次陳句山年丈韻

幾載警書客初春蹋雪人相依珠館舊頻對玉塵新聚白三番瑞煨紅一榻親案頭先業在照讀夜如晨

歲晚

歲晚雪初晴吁嗟老病身青衫徒累汝白髮太欺人蘧瑗非無過原思自耐貧園梅知我意先發一枝春

吳

棻

字大木號肇齋斯銘子烏程人乾隆辛酉舉人官海甯教諭著鶴聲集

固關

有燕趙雄關額

天險分燕趙崕崎越固關棧雲迷進退成埃絕躋攀肅肅轅門靜勞勞客子艱底須歌蜀道已不類人閒

文中子讀書處

吾道微言絕先生繼典型荀揚非所及汾晉有餘馨土室留

殘碣蒼崖列素屏想當抱膝處目已小朝廷

沈喬

字義村歸安人乾隆辛酉舉人著漫遊草

遊洗心亭

坦步出郭門逍遙任所適四野雲氣佳景風散阡陌榴樹吐
繁花野芳紛絡繹遠峯落前汀蒼翠正堪摘我欲陟其巔惜
無上山屐一沼方丈開凝流深且碧錦鱗時游泳縣羽爭格
磔臨池一舒嘯旅懷頓夷憚上有洗心亭周欄列文石乘風
企腳眠何用布瑤席平野綠陰濃麥苗滿疆場炎暑清晝長
歛蒸畏曦赫時有清風來披襟脫冠幘引領盼方塘堂堂復
策策魚鳥自親人慰此遠行客在昔宋文康節鉞留遺澤縣
津紹前休清吟懸亭額文采緬前賢風流映今昔挈伴偶尋
芳行止無定迹出遊乘興發歸來因興竭榆柳蔭道旁蟬鳴

自朝夕舊路誌不迷涼飈襲巾舄

楊際昌

字魯蕃號蕨漁山陰人乾隆辛酉舉人截取知縣著澹甯齋集

家傳畧葭漁自幼岐嶷讀書過日成誦及長敦孝友謹言行博學工文名噪兩浙截取縣令稱疾不赴託迹山林以授徒行醫終

蘇屬國

雲海茫茫幾歲華節旄落盡闕廷遐縱令白髮催胡地自秉
丹心許漢家上苑樓臺風景別茂陵松柏夕陽斜孤臣尙有
歸朝淚不獨魂消塞外笳

牟亦拱

字璧田黃巖人乾隆辛酉拔貢

宋世舉曰璧田性純孝以親老未赴朝考生平精熟儒先諸書著有學庸直解

石梁瀑布歌

天河之水匹練長上有烏鵲填橋翔帝惜勝景人不見特遣

神人巨刃摩天揚劈開玉峽白龍走蓬萊宮闕遙相望或云
鼇鼉駕禹後東海水立塵不揚怒濤相向九天落俯決巉巖
千仞何混茫轟雷冬拍格霏雪夏寒涼不霽虹自見無風波
欲狂若非海若徙蛟室應是織女羅錦章神仙窟宅兩美合
匡廬雁客皆尋常台山真是白雲鄉二奇最數飛流強與公
空言冒垂堂後更何人一踐將此閒直上通岷岡眼看長劍
搖寒芒安得兩腋清風張

申

甫字及甫號笏山西西安人乾隆丙辰舉博學鴻詞辛酉舉人官至都察院左副都御史著笏山詩鈔

詞科掌錄江都申及甫僑寓西安詩章秀拔律詩尤妍

九重時嘉賞之爲詩抒寫性情羌無故實白樂天楊誠齋查

初白其兔園冊子也歿後

畢中丞爲選擇而梓之
送厲太鴻歸錢塘

戶外紅塵插腳難爲誰牽率踏長安壯夫自悔雕蟲技名士
人多畫餅看我輩不妨還作達先生何必定爲官南歸正有
千秋業莫戀漁簑與釣竿

姚士湖

字錦川號芸間常山人乾隆辛酉舉人官福建永定知縣

縣志士湖清慎愛民案無留牘建鳳蘭書院修育嬰堂
邑人士霜其德作德政歌生平敦孝友睦鄰任恤之行
族黨傳誦

憶崕山舊遊

松風謾謾竹疏疏猶憶當年嘯咏餘清磬一聲僧定後歸雅
幾點月生初舊游依約憑留句壯歲蹉跎未著書喜是平生
愛岑寂敢云仙侶好樓居

草綠王孫苦未歸冶春芳訊與心違蝶欄一雨蕉花展鹿砦
無人槲葉稀愁絕金臺看落日閒將寶劍換征衣藏身人海

同治車庫系錄 卷六
如飄燕無限新詩憶翠微

徐

瑋 字勗武德清人乾隆壬戌進士官翰林院編修

尋武隆山寺

野寺知何處雲深境欲迷松篁遮絕磴崖嶂隱招提山鳥驚人起林猿畏客啼路逢樵子問笑指一峯西

嚴彭年

字西齋號既堂安吉人乾隆壬戌進士官河南臨漳知縣

首夏同陶藝之宋士衡李江峯由常樂寺出西郊遊李

衛公祠上方寺二首

錄一

緩步千愁散清眸一晌開登臨得空闊時序及恢台栗里多
高致蘭臺有俊才何妨呼太白促坐一銜盃

孫仁錫

字雲門號東野餘姚人乾隆壬戌進士

郭外

曲水開幽徑遙峯入畫圖前鄰依北垞隔岸是南湖蘋暗魚
相沫花深鳥自呼尙餘清興在頻過酒家壚

曲

藹字岷江
錢塘人

盤龍阻雨卽事

積雨重陰黯淡天山坳秋興亦蕭然門前征鐸臨晨動望裏
炊煙薄暮連處處蕎花翻紫浪離離粳稻徧青田爲霖已滿
蒼生願銅鼓迎神頌有年

吳寶芝

字瑞草一字過庭石門人官直隸祁州知州著小斜川詩集

陳世倌序畧君天姿敏異鸞停鵲峙淵源家學掉鞅壇坫其詩擺脫習俗卓然成一家言

草堂種蘭花水仙極茂賦此

十年耽僻滯江鄉手荷長鑣灌夕陽空谷秋深芳可掇寒巖
春到玉生香三間老屋槐陰舊一飯金齏日影長世德自來

耕與讀肯隨桃李倩新妝

孫大漢

字雨田山陰巖貢著秋槎詩鈔

吳尊盤序畧雨田詩才新穎爲會稽商寶意所賞已貢成均無所遇飢驅四方故詩多鬱伊之意

贛關

烽火前朝遠昇平故壘餘百蠻通食貨三楚接舟車客棹重關阻歸裝一橐虛不愁津吏索無稅到詩書

南昌謁先忠烈公祠

松檜森森聳鐵枝貞魂義骨想當時大江血濺蛟龍怒六月霜飛天地悲公殉難時忽江濤騰湧陰風晝寒一死百年扶國祚雙忠千古

共靈祠

祠以許忠節公配享

道旁猶墮遺民淚片石奚殊峴首碑

秦行凍

字印光臨海廩生

河開告成歌

海疆之政最難理分沙別石多礧礧山潮直落海潮衝高田
涸兮下田水濬河築埭開陡門考亭遺澤今尙存後來長官
獨耐事坐令新漲無舊痕憶昔清混有二閘往來舟楫候潮
發混閘入江清入河清且漣漪混不納古人制法與今宜在
溯其源辨其支不然泥古乖地勢徒令黔首增淒悲劉侯出
宰山海鄉撫此村落多飢荒大啟隄防爲疏濬不日保介成
此疆百里磽确變沃壤萬頃潏灩遶芳塘時聞布穀初下種
川原蓬勃生毫光知是傅巖作霖雨農夫乃求千斯倉吁嗟
乎金飢水毀適有時司民牧者善護持厥澤旣溥德旣備稱
此眾母蘇蒸黎

徐

昭

字闇夫號明河秀水人乾
隆甲子舉人著古愚詩鈔

先哲碎金先生生平耽詩每與萬徵君光泰曹孝廉培
亭緒茂才鳳翔相倡和

高宗南巡獻詩

賞翰林院典簿銜晚歲病癢臥榻廿年以吟詠自遣郡志稱

先生嘗手鈔五經三傳周秦唐宋大家文數十冊其劬

學如此

龍山襍詠

香海精廬面水涯山門雙樹尙查枒藏經墨寶名公迹過眼

雲煙鏡裏花有香海庵在白蓮寺為包氏香火院向有明代諸名人所書藏經後佚不存

九十猶聞吟誦聲人稱槐樹老先生藍衫重著吾親見壓帽

金花馬上迎槐樹先生朱姓名芬居郡城碧漪坊其宅後有西竺所產槐子樹因以為號以明經教授里中

一時門下士為極盛云

謾言掾吏少才思陳壽當年善寫詩蘭茁碧芽柳吐玉至今

爭唱早春詞陳壽字昌年嘉興人明景泰間郡像吏有松雲集其早春詞云柳條吐玉蘭芽小羅幕凝寒早

腸斷王孫歸未歸東風又綠天涯草

月冷風淒四十霜烏雲並翦不成妝寒香晚翠旌雙節紅粉

貞魂千載芳

寒香晚翠明成化中禮科給事中張甯二妾名張既致仕家居三十年卒而無子二妾剪髮自

誓凡四十年不下樓詔旌爲雙節甯字靜之海鹽人

幻居庵

在嘉興縣東內藏華嚴經爲韓敬侯嗣曾等入十餘人所書顏曰華嚴墨海每葉首皆趙宦光

篆書眞大觀也

項生東井文人畫盛叟宜山處士詩記與素公談往日芙蓉

初種幻居時

陳宗達

字景泗號藥房桐鄉人乾隆甲子舉人著燕臺澄江諸集

春日文子先生招同王大魯山西園限韻

春光澹沲來江南澄江日暖天蔚藍閒庭芳草吐新綠名園
上日窮幽探竭來風流羨六一招攜同伴人成三別墅從遊
忝陪列烏巾白袷容清談初從仄徑歷苔石漸臨曲檻依澄

潭枯池荷柄盡敲倒淤泥濁潦眞如泔平林漠漠淡煙織簾
眼恍忽羅重嵐坡陀怪石各有致癡如最屬雄如魑孤亭岑
崒氣蕭爽槎枒石樹撐楓楠老梅低亞更清絕晴暄盡折霜
苞含支頤磅礴坐良久依稀鼻觀聞優曇卻憐今年春信晚
不然花底恣沈酣狂呼騁目縱遠眺君山俯瞰何耽耽祇今
申澗剩遺迹儼如秋燕存空龕人生會合貴適意勝賞不厭
貪夫貪不見南樓劇幽邃深篁密樹交鬢髮蕭閒妬殺閑關
客午餘睡足鐘鐺鐺詩瓢酒瓢想擗當揮毫潑墨樂且湛獨
憐厯碌事征軼東西南北其奚堪焚香掃地平生願幼與邱
壑吾能諳白嶽黃山舊遊憩徑欲小築誅茅庵謝公登臨具
逸興聞言顧我頗深領夫子盛年厯臺閣曾從祕殿窺金函
學窮二酉探四庫風騷一化身爲擔白門夙昔仰山斗珊瑚

鐵網羣雅渰文旌卽日指吳會詩人猛士隨征騶張黃秦晁
指難屈不數短簿同髯參東南竹箭舊稱盛儲材未用誇榱
桷閒從公暇縱搜討聯吟闋韻披銀蟬新詩奇崛氣雄放劍
文剝蝕光生鐔而我枵腹等魏瓠巴吟里曲心懷慚青桐百
尺鳳凰叫屋梁巢燕空呢喃卻登經閣覓奇字偕游更喜朋
盍簪百弓千笏幽意愜淺紅小白花光涵叢薄日夕多畏佳
恍聞風激波洶洶歐蘇詠雪森紀律白戰不許持矛鏃卽今
韻險等競病催詩火急聊推戡枯腸搜索門匠巧斗室偃仰
同眠蠶詩成閣筆拍銅斗還期惠我春醪甘

葉方莢

號荻薪曠人乾隆甲子順
天舉人著東麓詩文集

擬戴安道雪後遺書王子猷約重泛剡溪

寒溪羃同雲風起吹還碎霽雪良復佳空山誰與對新陽射

朝瞰白日澄宵渥遙看爽氣橫笑指此君在聞子昨來游乘興了無礙有意聽彈琴何必不見戴

陳顧淵

字又聲亦作隔聲號藕田仁和人乾隆乙丑進士官戶科給事中

杭郡

詩續輯藕田官御史時以事遣戍

陽環後迎

鑒復原銜嘗典蜀試督粵學皆稱得士詩近玉溪生閒出入

于劍南

所著有南樓文稿續稿詩稿若干卷罷官日悉

自焚棄所存北梁吟稿皆在塞垣時作也

晚行

新鬼啾啾故鬼哭側翅烏鳶攫人肉萬里寒雲沒野蒿千盤積雪浮沙麓霜花割面冰裂膚疲馬凌兢蝟毛縮纔從井底頓游韁又向山巔轉行轂灌莽雖空豺虎藏巖坳或慮虺狐伏荒荒落日恐行人鬢絲影裏飄蓬獨風高月黑孤鴻肅襍被今宵就誰宿遙聞畫角響嗚嗚戍燈明滅煙屯簇

閒居漫興次少陵春日江村韻

茶煙當戶淡嵐翠撲簾深頗愜幽人趣偏驚獨客心青春來
有準白髮夢難尋萬里刀環信依依直至今

結習知何地棲遲已判年午風團翠靄一水閣靈泉鳥影當
窗度苔痕任屐穿停雲無限意迢遞隔南天
戶拂垂垂網庭餘漠漠苔跼踖宿習跼踖媿非材藥裹隨
時檢書郵計日裁只愁妨小吏抱牘去還來

草沿沙際綠花亞水邊紅蜂蝶喧春晝牛羊趁曉風更誰閒
作伴差免禿成翁飛動平生意茫茫百感中

春華終不改愁思等閒生帷蓋他年事軒車舊日榮觀心同
老衲洗過惜浮名落日亭亭遠中含萬里情

馮光熊

字太占號魯巖嘉興人乾隆丁卯舉人官至都察院左都御史

遠香詩話公宣軍機以敏幹稱隨果烈明公征緬甸箸
征緬紀畧後官黔撫定小竹山教匪南籠府种苗甚有
方畧權總憲以功名終
賜祭葬詩無專集訪錄一首鳳毛麟角彌足貴也

寄家書

豈爲功名計空羸白髮齊旅魂依浙遠天勢入黔低世路森
矛戟關山隔鼓鼙何時長水畔歸去荷鉏犁

崔學洪

字竹阮海鹽人
乾隆丁卯舉人

讀書臺奉酬錢香樹尙書

臺在縣橫山有巨石存焉爲
唐顧通翁況讀書臺遺址

雙峯蘭若寄疎頑遺蹟高臺尙可攀乞得鴻文鐫石壁一拳

應擬作名山

張守愚

字直夫號心椰烏程人乾隆丁卯舉人官
四川梁山知縣著培松南川梁山等集

吳興詩話心椰嘗繪耕田
識字圖諸名家多題詠

黃草坪

今知蜀道難如此黃草坪高萬樹交彷彿人聲出空際依稀
日色在林梢嘶風駿馬堪爲伴竄草飢飈自覺巢腰裏青萍
託生死杜陵懷抱莫輕嘲

來學謙

字益甫蕭山人乾隆丁卯舉人官義烏教諭

自述詩示兒輩

世無百年身憂常抱千載孰是曠懷者屏落形骸外憶自束
髮初讀書少蒼萃鹵莽與因循垂老方生悔自維積學翁此
志尙雄邁壯歲走天涯業疏顏亦改留覽徧雲山轉使心神
快晚通蘭蕙交彷彿煙霞會頭白受一官俯仰兩望礙骨肉
再分張臨風羞晤對墓木森成圍魂夢猶親愛陡思易簣時
雲若春冰碎中宵斷雁羣撫孤看爾輩不恤賤且貧所患惟
愚昧荆棘滿前途投足慎取敗松楸麥奠微風雨蕭牆潰激

湍蕩中腸沿洄益憔悴爲謝劉阮徒怒焉發長喟

上朱學士石君先生

十年京國樂清貧骨重神寒自有真仍借玉堂留雅望肯教
金管付稠人盟心淡泊鏤冰雪司命文章毓鳳麟只恐
綸扉催入侍蹕涔十倍隔龍津

毛鶴翀

字寄庭號珠川
江山人恩貢

須江詩譜先生嗜古博學工書精篆刻則例館行查各
州縣校苑蔡東軒師以何吉茅劉香雪暨先生三人應
薦

夜過觀成堂別業見蘭菊盛開賦此

衆卉皆含香紛紛不免俗氣味清且幽惟有蘭與菊稱隱
逸花落英天氣肅蘭爲王者香別韻冷空谷二妙猶二難往
來縈心腹涼夜長相思魂夢幾馳逐偶來觀成堂堂側開書

塾叩扉入短籬隱隱生馥郁欣然問主人主人爲予復自來
性嬾疎曾不修邊幅構此半畝居朝夕課兒讀靜裏樂餘閒
種蘭兼種菊草木異本根芬芳無遲速持此答秋光開懷酒
盈斛言罷牽我衣行行還秉燭相隨次第看使我豁心目欲
歸復遲留低徊滋感觸人生天地間爭雄策高足高足不可
期蹉跎空碌碌笑彼雄之飛何如雌之伏盡學主人翁允爲
莫大福

獨坐

一雨空齋靜疏桐俯綠苔撥醅開舊庫聞笛識新材階葉隨
禽下欄花待月來燒香且趺坐無悶意悠哉

夏

鴻

字儀甫錢塘增生

緝雅堂詩話儀甫詩有雨後數花猶抱蝶春殘一月不聞鶯句風致特絕

恭和

御製題敷文書院元韻

千巖曙色映亭園

警蹕聽傳

幸講門舍列上中勤訪制道延鄒魯獨尋源春風自擁

鸞輿出大雅羣欽

鳳藻存從此草茅懷

睿訓願期古處益相敦

李

芝

字謹墀號山友錢塘人著淺山園詩集十七卷

杭郡詩續輯謹墀爲杭堇浦太史入室弟子少時有句云荒亭懸落日古佛倚寒山以此得名在里中時與單杜可莫灘山馬秋藥諸詩老相倡和而與仇一鷗蹤跡爲尤密看花貰酒所至必偕所居曰香草敝廬在雲居麓之麓

邱庵

一徑入亂雲支筇倚巖戶幽壑風自來層嵐日忘午積翠漏
晴暉空響驚驟雨院靜若無人姓傳知有主但覺行迹稀已
云歲月古碧注石泉甘香泛春茗苦偶折青松枝談禪一揮
塵

峽山飛來寺

江上日可畏停舟到古院懸厓何蒼蒼挂此冰一片石色堆
陰雲水花飛素霰灼爍扶桑然蕭瑟櫻欄戰孤亭風雪中久
坐客忘倦不知心如洗已覺寒生面咫尺分炎涼翻疑氣候
變

西一厓曰蒼
雪上懸瀑布

一溪多嘉樹溪盡來仙源清風吹未歇好花飛已繁多情有
高士攜鋤破雲根寂寞瑤臺下千載埋香魂人生苦易感落

花本無言其登清音樓可以傾芳樽如何好靜者不憚泉聲

喧

一洞鐫仙源二字即瀑布發源處有白石三壘瑤臺叔子漣花之所又建清音樓于其上

寓大佛寺

傳舍原非久市中聊避喧蟲書刊貝葉蟻路嵌榕根海月閒
如客山雲忽到門憑誰消旅恨寂寞對芳樽

至岱廟尋蔡邕隸書不得

行穿道院獨歸遲莫怪旁人笑我癡古樹幽花春日好何須
苦覓蔡邕碑

戴樹元

字春壇廷燭子錢塘人

杭郡詩三輯刊上故家藏韜光詩卷乃乾隆八年丁龍泓戴鵬亭金聞石丁誠叔戴春壇及其弟秋穀諸子倡和詩留作山中故事者春壇詩未見前續兩輯因亟登之

坐滌煩閣分得方字

蘭若不受暑萬竹圍崇岡傑閣豁眼界巒岫羅低昂雲陰互
明晦遠近分青蒼樹隙見湖尾煙際浮江光塵氛俯城市火
宅無清涼坐啜巖下泉濁世如遺忘遲回白雲地信宿青豆
房隨境作禪悅差擬浮屠桑蒲團參妙義魚鳥同相羊幻滅
空不壞了悟長生方四相妙解脫人佛兩茫茫

自雲林晚歸弢光

古寺棲殘照涼陰曲逕生泉從雲際落人在竹中行木杪聞
樵語風餘度磬聲諸天看已暝回向佛燈明

沈起潛

字芝塘仁和人著
於斯堂詩集四卷

平聖臺序畧沈子芝塘之詩煙雲落紙潑墨隨形
如道子天王飛揚芳發如貫休羅漢剔異搜奇
陳柱生序畧吾友沈徵君芝塘郡舉
孝廉方正不就樹立有素人皆高之

天監年小銅佛歌同六芳弟作分得銅字

古佛鑄自天監中須彌幻影窮人工歷千萬劫不磨滅璆鐵珠貝無能同銅青埋老變金紫肉髻剝蝕煙濛濛彷彿當年同泰寺曼陀散落天花紅頗覺垂眉有生氣蓮華臺上來香風白毫纖小舍利活斑駁不辨金與銅而我供養有年所未嘗向佛求窮通佛力曾保金甌固佛心曾憫臺城空我因頂禮發長歎梁皇撒手荷荷終

沈

端

字亦鼎歸安貢生
簪似齋偶存詩

陸孝子墓

孝子名國榮以母病割肝而沒墓在
翳一圩南匯鵠鷹灣口事載省志

野曠風聲悲鴉飛日影墜土花含青碧柏葉染深翠下有長恨人伸腳此中睡當時侍阿嬾神魂不知瘁思挽桑榆景遽爲髮膚累惟孝可格天此語人咸識翳彼天無靈如夢復如醉我後三十載聞之心猶悸因風爲憑弔步履一再至感我

反哺懷未展鳥鳥翅觸我風木恨空灑舉魚淚誰無父與母
顧之殊自媿敢或嗤以愚愚者洵寡二

水蓼花

花事重陽節節刪數株璀璨映潺湲黃蘆岸畔姿偏媚白鷺
洲前色更殷淡襯殘虹遮野渡濃拖返照落漁灣懸知熱客
無心賞輪與幽人領畧間

搖曳秋茅入畫圖飄然一舸寄菰蒲暮鷗曉雁依三泖細雨
斜風隱五湖傍水生涯原自淡傲霜骨格不妨孤青春詎少
名花卉曾有仙人墨記無

馮

錦

字菊仙號網齋會稽人官淮
安稅課大使著詠雪樓詩集

愿下次船山太守

問陶

對月有感原韻

客裏看明月經今兩度圓一輪照離別千里共嬋娟花影掃

香霧笛聲吹冷煙海棠簾外立我亦未能眠

聞雁

落葉打窗紙歸鴻風唳酸關山一片月砧杵萬家寒信斷懷

蘇武詩成寄李端

有懷仲恂

昨宵破清夢遠寺曉鐘殘

毛紹睿

字聰甫遂安人乾隆戊辰進士官江南道監察御史

燕邸秋懷

紛署回時日漸曛一聲長笛雁初聞風飄遠岸蘆飛絮露滴
深宵鶴唳雲冉冉光陰催鬢短勞勞案牘治絲棼采芳空有
江南約聽鼓還隨鴈鷺羣

徐鶴齡

字皋音瑋子德清人乾隆庚午舉人官青田教諭

點易亭

在青田縣西北山巔唐葉法善明周易元宗有滴露研朱點周易贈句故以名亭

曾見清溪道士無高亭空說露研朱羲皇以後紛談論獨抱

先天太極圖

李恭寬

字栗齋，鄞人。乾隆庚午舉人，官廣東連山知縣。

縣志：恭寬知連山縣，民獠雜居，動輒械鬪，爲申條教，嚴約束，并擇耆老，俾以文字導其子弟，桀驁漸化，爲循良。值行邊，早起，觸瘴卒，宦橐蕭然，民感其廉，明集賻贈之，始得歸葬。

和雙雲堂主人詠雪用禁體步東坡聚星堂韻

朔風先驅振槁葉，凍雲萬里旋飛雪。
纖纖密密勢紛披，整整斜斜態奇絕。
厚積郊垌蝗蟹藏，重壓園林鳳梢折。
光浮窗紙倍玲瓏，影照書幃半明滅。
茅茨清雅足自怡，錦帳麕豪直須掣。
喜看穿柳綴作花，更愛縈波漾成纈。
賞心冷淡煮冰泉，驚人咳唾看霏屑。
擬拏鷁首來追隨，遙想龍宮正飄瞥。
聳肩獨對梅花吟，有懷莫向素心說。
伸箋聊爾道相思，凍管寒煙呵研鐵。

登樓

長空極目動羈愁殘照西風一倚樓衰柳長堤鴉陣晚野花
茅舍蝶衣秋聲聲霜杵菰蒲岸點點漁燈杜若洲風景江南
原彷彿鄉關何處思悠悠

陶士麟

字綬臣會稽人乾隆庚午舉人官武義教諭

題王孝子孝烈傳

孝子諱世名武義人萬厯間諸生父良爲族子俊爭
室毆死恐殘父屍不忍就理佯聽受之繪像購刀銘
曰報讐服闕生一子曰可以死矣乘俊醉歸擊斃之
入白母詣官官謂檢父屍有傷可無死孝子曰惟不
忍殘父屍以至今日不然何待六年昇棺欲開視頭
觸石血流殷地官欲全孝子曰此非法也不食死妻

俞氏撫孤三載亦自縊

熟谿之渚壺山陽厥星維婺垂寒芒厥邑維武稱烏傷中有
人兮秉天地之正氣浩然與日月而爭光綽楔俎豆揚芬芳
姓氏猶傳孝子王孝亦人之庸行爾誰無父者君獨子死忠
死孝古良難父仇不報心不死胡蠅山前石徑斜西風古木
悲嘯鴉青天爲我撥雲霧白日爲我停颺車寶刀不飲仇頭
血干將莫邪等頑鐵此時相對心眼明搥胸扼吭斯一決投
身獄吏何所辭觸石淋漓痛父屍子捐軀兮妻殉節令名千
載靡窮期有明二百七十祀惟君不愧登青史孝義之行幾
輩眞晨星落落差堪指偶來仁里掇風詩芳躅依然話昔時
未知蠟屐金貂客誰與臨風酌酒卮

陳開基

字史瞻號訥齋青田人乾隆庚午優貢官永嘉訓導

縣志開基祖有隱德父正以孝聞時文體靡曼開基矯以清折高者近艾園樸山與韓錫胙同學故韓陳並稱緝雅堂詩話陳君開基恭應

高宗南巡召試欽取一等第二名一名屠君可堂三名沈君初四名施君養浩姓氏已見前錄今與五名夏君鴻補行采入以紀盛事

試劍石歌

混元峯高天漢逼嵯峨一片青瑤截十里松陰古徑荒烹丹點易俱陳迹仙翁鍊藥白雲間采芝攜朮滋朝餐拔劍擊石石開裂神鋒上燭斗牛寒道成鼎畔臥龍虎元圃飛昇隔風雨開元遺躅久蒼茫石肉猶腴石皮古我今臨眺每徘徊長懷招鶴鶴不回鶴去無復仙人蹤澗水寒流夕照空君不見眼前勝地今非昔翠虬亂舞巖前風

恭和

御製題敷文書院元韻

湖山佳氣滿林園吳越諸生盡在門一院松聲留

睿賞

九天春藻沛詞源化行械撲

君師並統接危微道義存幸際

盛明深愛士益知稽古力宜敦

朱敏學

字震行錢唐諸生

暮春喜晴

忽聽鳩呼婦晴光透竹扉花殘疎影亂林澹積煙微新燕窺
簷落游蜂拂檻飛城頭登眺者又著藕苗衣

沈廷懷

字孟公號寶田元滄子仁和諸生著力行堂集

吳顯傳畧孟公從查查浦學詩與弟房仲椒園齊名後隨父東隅文昌任所東隅成甯夏孟公間關侍養風雨渡三白蕩

行盡江南路傷心易白頭波濤千里夢風雨一歸舟小聚樹
陰合遙天水氣浮到家欣有日舉室慰離愁

汪繹辰

字陳也泰來子仁和諸生著卽是深山館集

吳顥傳畧陳也家中落居城東之南園託業于醫以自給亦工八法

送吳二樹屏之武昌

河梁握別語酸辛我已無家君遠征飢朔半生多乞食狂衡
十載未成名殘春綠樹懷人夢薄暮青山客子情挂席洞庭
煙水闊好收詩句向南旌

汪

浦

字蘅洲坤子仁和廩生

吳顥傳畧蘅洲性簡默爲文餽三陳先生少陽同甫止齋皆能涉其津岸年三十三以肺病歿士林惜之

桐華書屋小集

細雨澹春夕空階屐齒深暝禽喧隔樹積翠上重襟靜侶少

塵色清尊愜素心坐來風漸瀝燒燭續微吟

顧正謙

字鳳池一號
併欄仁和人

緝雅堂詩話併欄詠史有昇才如詠王猛云捫
蝨能談天下事恨無功業到中原語甚沈痛

題錫公子畫冊

芳甸碧蘚滋長林新雨沐岸柳遠含煙溪水靜生綠欣茲春日長轉愛游蹤獨呼童攜素琴擬向巖際宿

旁山結茅堂境僻少塵累竹色周四圍因風墮寒翠中有坐
隱人枯棋靜相對時聞落子聲驚起孤鶴睡

錢

森

字蘭佩號長農長與人乾隆
庚午恩貢著魚干里齋集

縣志森孤幼貧筆耕奉母以孝聞晚年貧甚守益堅閉
戶苦吟風雪之夕雖炊烟久寂弗輟也與丁凝王豫先
後稱若溪三詩家丁王既死森獨提唱風
雅持律尤嚴別裁偽體賴此一緘香云

梅街續游

挈榼牽舟笑口開酒人三五共沿河今年不負看花眼條浦
梅邊到兩回

山靈幸勿笑恩恩踏破青鞵興未窮來歲徑須攜襖被與花
守盡首番風

泛畫溪有懷唐學士錢微

幽奇深秀此鍾靈倍愜游觀溯典型望重碧雞思珥筆聲清
雛鳳想趨庭霜楓染臙袍花紫風竹書留汗簡青故里依稀
尋故宅煙蕪久沒入甑廳

洗心亭

川原開百里絕頂見周遭天水相兼闊雲山欲競高風光呈
細膩意思得粗豪力疾還踰險山靈識老饕

下若寺

迂途引到殘僧舍廣廈行來古帝居自羨閒情饒別趣共扶

徑竹看池魚

曾

煥

字赤城永嘉諸生
著友十花樓詩存

孫錫鳴序畧赤城曾先生居貧喜哦詠工畫花卉草蟲
身贏多病藥爐經卷晨夕相對其詩善於言情工於體
物五七言律皆清麗可誦友十花樓者先生昔時文酒
燕游之地相與擘牋闢韻刻燭分題則有張泰青孟平
衡青仲平李士詔金門士京仙苑陳越英蓋川渠英芸
石丁鍾英蘭坡童冠儒硯農吳楨桐岡馬如春滌泉凡
十人並一
時知名士

游仙詞

幾閒茅屋白雲封住我蓬萊第一峯三萬頃田種瑤草耕煙
鋤雨喚蒼龍

觀獵

萬里天空平野闊無邊落木蕭蕭脫將軍結束出渭城人聲

馬聲兩相聒圍場十里縱大觀揚鑣逐隊如雲團左顧右盼
逞馳突角弓銀箭輝雕鞍上窮鵠鷁下狐兔不數穿楊過百
步舉旌唱獲功孰多鼓聲未衰日將暮西風勁兮草色枯前
騎後騎追嘯呼回營鷹犬歸何處祇見毛血飛平蕪

村中口占

添得清游處扁舟撥短橈四山圍抱寺一水曲通橋訪舊停
吟屐尋春挂酒瓢幾忘歸路遠落日聽歌樵

夏夜友十花樓獨坐

風送誰家笛樓頭已二更窗虛知月上人靜覺涼生花氣澹
逾遠蟲聲淒復清從來慕幽隱物外有閒情

春日同友人松臺晚眺

引人芳草綠侵衣一路行吟上翠微怪石鋒稜逾鶴瘦老松

鱗鬣學龍飛山銜落日嵐光滿城聳長空樹色稀健羨牧童
牛背笛杏花村外醉忘歸

周

灃

字芭東號東阜嘉善人乾隆辛未
一甲三名進士官翰林院編修

績橋李詩繫東阜沈潛好學與兄迪文互相師友專攻
馬鄭賈孔諸書旁通天文輿地兵農經世之務晚尤究
心通典通考二書拾遺糾繆不下萬餘條庚午與兄同
舉於鄉辛未會試第一臚唱第三人授編修以親老乞
歸旋卒

擬陶無絃琴

解組歸田園心神雨如釋挾冊時一吟章句非所索澄觀縱
孤往嗒焉化陳迹羲皇忽已遠枯桐聊挂壁緬維賞音者誰
復違所適清風來無邊流雲逝空碧萬籟自相薄希聲盈我
席古人不可見抱此永朝夕

朱家濂

字性之揭子錢塘人乾隆辛
未進士官河南光州知州

杭郡詩三輯性之

初幸醴泉有善政

初秋桑菽甫丈招集湖舫同盧敬甫存心盧息溟壽朋

汪晴江春溶宋萊衣慶嘉余紹文昂霄作

湖光屬先生復不私諸己愛茲清冷淵分酌一瓢水湖外紛
膠擾俱作等閒視翛然濯吾纓隨處滄浪湫竭來清鶴夢水
風徐入耳流觀天宇高秋雲薄如綺疏疏隔汀柳無人自眠
起餘暑亦灼人移置冰壺裏兩槳趨涼陰意似飛黃駛相將
我與鷗共占青莎美

吳坦字履平號天垣錢塘人乾隆

辛未進士官江蘇溧陽知縣

毓英韻

門掩疏枝曲徑幽道林曾此闢山邱紫驂雲散祇圓跡白鳥
魂飛佛國秋竹裏平橋通別澗松閒斜閣度危樓笛聲吹斷

江城曲天女應知在上頭

葉

藩

字登南號古渠晚號皋亭山農仁和

杭郡詩續輯古渠由翰林歷官知府歸田後主講楚北
江漢新安紫陽四明月湖諸書院居家與昆季及老友
時爲湖山之游

古藤書屋藤花詩

主人迹半天下奇晚以陋室絕眾馳入門如敬前輩友根本
盛大香紛披晞陽東海長靈液奪秀湖淥生春姿千條聯聯
雲袂破萬花蠶蠶天罅彌羣游紫鳳各得所眠風躡露相娛
嬉倚赤杖聽白鳥語況有朋舊來歌詩流傳好事徵畫本丹
鉛點筆色不虧家貧不能具肴饌未免爛漫開酒卮隔牆書
聲喜童州座上歎詫多眉黎蝶勤蜂嬾盡物態落花妝地陰
鋪墀百年閱爾直旦晚名與宅井常在茲

葉

棠

字香國石門人乾隆辛未進士官山東兗州知府著初桃集歸田集

縣志棠知甯武府革陋規守充日值秋靈黃水匯流田廬淹沒悉心振卹濟甯水無所歸濬下流以殺其勢又請設滾水閘水與閘平濟運足而充亦無水患

南陽鎮阻雨

翻因阻雨得安便湖畔空房借榻眠夜半窗明雲漏月階前
水長屋通泉陰晴厯落春歸日草樹淒迷遠接天不覺撩人
鄉思切鬚眉對鏡一茫然

方

森

字越珊號筠谷歸安廩貢官紹興訓導

緝雅堂詩話筠谷五言如花飛春夢短簾下月光遲點展碧苔破攤書紅燭涼皆有韻致

題鄭荇洲先生

若聰

納涼圖

苧衫蒲簟坐疎林散髮消搖傍漢陰碧澗迴流松韻遠白雲
遙過雨痕深翛然自是忘機客曠絕真諧出世心還往溪邊

頻載酒藕花涼處足幽尋

丁體仁

字厚餘長興人
著安雅堂集

三鷗岡展謝太傅墓

馬鬣空傳傍故城謝公鄉在尙含情
初懷遠志成高臥豈比空函浪得名
絲竹未妨朞月服弈棋那管八公驚
白楊暮雨蕭蕭起遙憶西州淚欲傾

陳武帝故宅

披榛徙倚古城東聖井猶存廢刹中
僻地三餘開霸祖殘碑千載想英風
可憐玉樹新聲起頓使金湯舊業空
爲問南朝幾興廢交州舊事憶豪雄

顧應期

字夢汀蕭山廬生著
晏如齋詩鈔三卷

永興集夢汀幼穎悟家貧力學聲譽日起
隱居授徒請業者屢盈戶外教人以立行爲
本嘗取揚雄傳晏如自

兩浙軒輊錄

卷六

丁體仁顧應期傳登

至

守句及陶靖節語以顏其齋
著有晏如齋古文簡鈔三卷

題梅墅廟廟祀梅福

雙鳧何處去遺廟越江隈
過客泉名釀釀泉橋在廟南里許仙人市號

梅梅墅一作梅市社迎白鹿至
儀像漢官來拜罷尋歸路高峯月滿

臺

傳燈字澹如諸豎歲貢

五洩

老子愛山愛徹骨十月麻鞋犯冰雪
絕磴千盤行不前但覺飛湍懷毛髮
石林水府水所沃駭浪奔騰山石裂
祗知五岫有靈湫豈識茲山更奇崛
半空突出射天門三峽流倒黃河
奔素蚪擎攫翠蛟舞井幹千尺垂銀繩
雷車怒擊冰雹散石峽峻滑蒼烟屯
憑厓仰視心魄動造物詭怪難細論
吾聞謝

客登茲山瑤草滿谷花爛斑又聞劉龍出谷口驚沙亂石皆
奔走至今七十二峯尙如故蒼厓絕少登真路怪松高挂俯
絕壁猿猱踏翻松下石日光半漏仙桂紅雨腳暗含蛟洞黑
不須五岳搜名勝舉頭已入廬峯徑願攜祁鄭好丹青鉤取
銀河瀉石磴

蔣佐乾

字松洲臨海歲貢

戚學標曰松洲性耿介不輕然諾家居授徒多所成就

秋懷

商飆吹雨激遙空一片秋聲雁陣中寫出隔江涼意足葦花
纔白蓼花紅

客窗睡眠半朦朧怕向鐙前聽草蟲涼月入簾清夜永人生
耐得幾秋風

兩浙輜軒續錄

卷六

嘉慶庚子 別刊

三

1181

張步瀛

字仙洲永
嘉廩貢

訪隱者

幽人家住翠微灣
竹杖芒鞋幾度攀
卻羨山居無別侶
與雲同住屋三間

兩浙輜軒續錄卷六